

**TALKING POINT**  
**YG. BERBAHAGIA DATUK PROF DR KAMARUDIN HUSSIN**  
**NAIB CANSELOR UniMAP**  
**MAJLIS KHATAM AL-QURAN PERINGKAT UniMAP**  
**SEMPENA SAMBUTAN IHYA' RAMADAN 1435H/2014M**  
**SURAU KAMPUS TETAP UNIMAP, PAUH PUTRA**  
**21 JULAI 2014**

Bismillahirrahmanirrahim

Yang Berbahagia, Timbalan-Timbalan Naib Canselor UniMAP,

Yang Berbahagia Pegawai-pegawai Utama Universiti,

Dekan-Dekan dan Ketua-ketua Jabatan

Warga kerja dan warga Pelajar UniMAP, seterusnya hadirin dan hadirat yang dirahmati Allah sekalian.

Assalamualaikum Warahmatullahi Wabarakatuh,  
dan Salam Ilmu, Keikhlasan, Kecemerlangan UniMAP

- Alhamdulillah, bersyukur kita ke hadrat Allah S.W.T. kerana berkat rahmat dan izin-Nya, kita dapat bersama-sama pada Majlis Khatam Al-Quran Peringkat UniMAP Sempena Sambutan Ihya' Ramadan 1435 Hijrah/ 2014 Masihi.
- Setinggi-tinggi ucapan terima kasih kepada Pusat Islam dengan kerjasama Pusat Pengajian Kejuruteraan Bahan atas undangan untuk saya hadir dan seterusnya merasmikan majlis yang penuh keberkatan ini.

Hadirin dan hadirat yang dirahmati sekalian.

- Bulan Ramadhan sememangnya bulan yang mulia dan menjanjikan ganjaran yang cukup besar. Sebagai mana firman Allah di dalam Al-Quran Surah Al-Baqarah Ayat 185 : (Masa yang diwajibkan kamu berpuasa itu ialah – Bulan Ramadhan yang padanya diturunkan Al-Quran, menjadi petunjuk bagi sekalian manusia dan menjadi keterangan-keterangan yang menjelaskan petunjuk dan (menjelaskan) perbezaan antara yang benar dengan yang salah. Oleh itu, sesiapa daripada kamu yang menyaksikan anak bulan Ramadhan (atau mengetahuinya) hendaklah ia berpuasa pada bulan itu, dan sesiapa yang sakit atau musafir maka (bolehlah ia berbuka, kemudiannya wajibah ia berpuasa) selama hari yang ditinggalkan pada hari-hari lain. (Dengan ketetapan yang demikian itu) Allah mengkehendaki kami beroleh kemudahan dan tidak menanggung kesukaran. Dan juga supaya kamu mencukupkan bilangan puasa (sebulan Ramadhan) dan supaya kamu membesarkan Allah kerana mendapat petunjukNya dan supaya kamu bersyukur.
- Dan sebagai memenuhi tuntutan amalan di bulan Ramadhan yang tidak hanya memberi fokus kepada puasa semata-mata, maka dengan itu Allah juga menggalakkan kita membanyakkan bacaan Al-Quran.
- Justeru saya menyambut baik usaha Pusat Islam dengan kerjasama Pusat Pengajian Kejuruteraan Bahan menganjurkan program ini bagi menyuburkan minat membaca al-Quran yang mendalam di kalangan staf. Ia ternyata telah membuahkan hasil seperti yang kita lihat pada hari ini. Tanggungjawab yang besar ini tergalas di setiap bahu warga UniMAP amnya.
- Saya percaya, penganjuran majlis ini bukan sekadar untuk meraikan kejayaan warga UniMAP menamatkan pengajian membaca al-Quran

pada bulan Ramadan yang mulia ini, tetapi apa yang paling penting ialah mesej yang hendak disampaikan dan pengertiannya kepada kita.

- Penghayatan kepada isi kandungan ayat-ayat suci al-Quran juga akan memberi kita inspirasi dan galakan untuk lebih berusaha mendekati diri kepada Ilahi dan menguasai segenap bidang ilmu pengetahuan. Ini kerana al-Quran banyak mengajak dan menyeru manusia untuk menimba dan memartabatkan ketinggian ilmu dalam kehidupan. Seperti ayat al-Quran yang pertama diturunkan kepada manusia yang bermaksud ;

***“ Bacalah, dengan nama Tuhanmu yang telah menciptakan. Dia telah menciptakan manusia dari segumpal darah. Bacalah dan Tuhanmulah yang maha pemurah, yang mengajar (manusia) dengan perantaraan kalam. Dia mengajarkan kepada manusia apa yang tidak diketahuinya”. ( Surah Al-Alaq: ayat 1 hingga 5)***

- Kita sedang melalui peringkat yang keempat selepas pembacaan, hafalan dan pemahaman iaitu peringkat pelaksanaan isi kandungan al-Quran. Inilah sebenarnya tuntutan al-Quran. Ia bukan setakat untuk dibaca dan dihafaz, tetapi lebih jauh dari itu untuk diamalkan. Betapa ramai orang yang membaca al-Quran dan menghafaznya, tetapi dilaknat oleh al-Quran kerana tidak mengamalkannya.

Hadirin dan hadirat sekalian,

- Penguasaan ilmu pengetahuan merupakan teras bagi membentuk bangsa yang cemerlang dan berjaya, yang didasari oleh jati diri dengan ketinggian akhlak dan budi. Insan yang berilmu seperti ini akan dapat menguasai dan menguruskan alam, memanfaatkan segala nikmat kurniaan-Nya untuk kesejahteraan ummah.

- Integrasi ilmu-ilmu ini menyebabkan pandangan ilmuwan Islam amat luas dan berkait rapat antara satu sama lain. Kekuatan inilah yang menyebabkan mereka menjadi modal insan yang berkualiti dan menjadi tunggak kemajuan ilmu dan pembinaan tamadun yang unggul, pada masa lalu.
- Modal insan cemerlang yang diperlukan oleh negara pada masa hadapan ialah mereka yang mempunyai pengetahuan yang tinggi, berpegang teguh kepada agama, berkemahiran, inovatif, memiliki jati diri, beretika serta mempunyai minda kelas pertama. Mereka ini bukan sahaja penting kepada pembangunan negara, malah memainkan peranan yang penting bagi menjamin kesejahteraan dan perpaduan rakyat serta meningkatkan daya saing negara di peringkat global.
- Kepada warga UniMAP, semoga kejayaan dalam menyertai Majlis Khatam Al-Quran peringkat UniMAP ini, akan mencetus semangat dan kesungguhan untuk menghasilkan usaha yang lebih berjaya pada masa-masa akan datang. Semoga tuan-tuan dan puan-puan dapat melaksanakan tugas dan tanggungjawab ini dengan penuh dedikasi dan cekap. Akhir kata, saya mendoakan majlis ini akan dilimpahi keberkatan dan kerahmatan daripada Allah S.W.T.
- Dengan lafaz ***Bismillahirrahmanirrahim***, saya dengan sukacitanya merasmikan **MAJLIS KHATAM AL-QURAN PERINGKAT UniMAP SEMPENA SAMBUTAN IHYA' RAMADAN 1435H/2014M.**

Sekian, Wassalamualaikum warahmatullahi wabarakatuh.